

Kerajaan akan terus konsisten perangi rasuah – Anwar

Eddy Aqmal Mohamed Hamidi
9 Disember 2022, 7:13 pm

PUTRAJAYA – Perdana Menteri, Datuk Seri Anwar Ibrahim menegaskan bahawa kerajaan kepimpinan beliau akan terus konsisten dengan usaha memerangi rasuah.

Anwar menerusi perkongsian di platform media sosial berkata, agenda reformasi terutamanya dalam usaha mencegah rasuah tidak hanya terhad kepada aktiviti penguatkuasaan.

“Sebaliknya, nilai-nilai seperti integriti, akhlak dan etika adalah aspek yang perlu diterap dalam kehidupan bermasyarakat dan bernegara.

“Dengan meraikan serta memartabatkan integriti, ia berupaya memacu Malaysia ke arah kecemerlangan yang holistik yang akan mencakup aspek fizikal, rohani, nilai dan identiti,” katanya menerusi perkongsian di laman Facebook hari ini.

Beliau berkata demikian bersempena Hari Antirasuah Antarabangsa yang disambut hari ini.

Terdahulu, Ketua Pesuruhjaya Suruhanjaya Pencegahan Rasuah Malaysia (SPRM) Tan Sri Azam Baki berkata, Malaysia berbangga menyertai komuniti antarabangsa bagi memperingati Hari Antirasuah Antarabangsa dengan tema: UNCAC at 20: Uniting The World Against Corruption.

“Ia merupakan satu pengiktirafan sekaligus menjelaskan bahawa memerangi rasuah dan bukan tanggungjawab satu entiti semata-mata.

“Kerjasama global merentas sempadan semakin diperlukan untuk memerangi rasuah dan penipuan kerana jenayah kewangan tidak lagi terhad dalam sempadan sebuah negara sahaja,” katanya ketika berucap pada Forum Sempena Hari Antirasuah Antarabangsa 2022 secara dalam talian hari ini.

Azam berkata, di Malaysia, SPRM menggunakan pendekatan holistik menerusi tiga strategi utama iaitu, penguatkuasaan, siasatan dan pendakwaan, serta pencegahan rasuah dan pendidikan masyarakat.

“Peruntukan Liabiliti Korporat telah berkuatkuasa pada Jun 2020 di bawah Seksyen 17A Akta SPRM 2009, yang mana sesebuah organisasi komersial boleh didakwa jika mana-mana pekerja atau sekutunya melakukan rasuah untuk kepentingan organisasi.

“Syarikat juga perlu bertanggungjawab sekiranya gagal membuktikan bahawa pihaknya telah mengambil langkah-langkah yang mencukupi untuk mencegah berlakunya amalan korup dalam urusan perniagaan mereka,” ujar beliau.

Tambah beliau, prinsip peruntukan itu bukan semata-mata bersifat punitif, namun ia digubal bagi memastikan syarikat telah mengambil langkah yang mencukupi untuk mencegah rasuah dalam organisasi mereka.

